

- वित्त मंत्री निर्मला सीतारमण काल लोकसभा मांय माली साल 2026-27 रो आम बजट पेश करेला।
- प्रदेश मांय लगाया जा रह्या ग्राम उत्थान शिविरां ऊँ हाल ताई 28 लाख जणा ने फायदो दियो ज्यो।
- प्रधानमंत्री नरेंद्र मोदी मायतां ऊँ बोर्ड रा इम्तिहान रे दौरान घर रो माहौल हल्को-फुल्को राखण री अपील कीनी।
- मौसम विभाग 12 जिलां सारू बारिश व्हेवण अर ओला पड़बा रो ऑरेंज अर येलो अलर्ट जारी कीनो।

000

वित्त मंत्री निर्मला सीतारमण काल लोकसभा मांय माली साल 2026-27 रो आम बजट पेश करेला। लोकसभा मांय पेश व्ह्यां पाछे बजट री कॉपी राज्यसभा मांय पेश करी जावेला। वित्त मंत्री रो बजट भाषण पूरो व्ह्यां पाछे बजट री कॉपी मोबाइल ऐप अर वेबसाइट माथे ई देखी जा सकेला। वित्त मंत्री बजट पाछे देश रा न्यारा-न्यारा कॉलेजां ऊँ आया विद्यार्थियां सागे ई बातचीत करेला। केन्द्रीय वित्त मंत्री रा बजट भाषण रो आकाशवाणी ऊँ सीधो प्रसारण कर्यो जावेला। केन्द्रीय बजट ने ध्यान राखता थकां आकाशवाणी जयपुर ऊँ दोपहरां पाछे 01:00 बज्यां प्रसारित कर्या जावण वाळा हिन्दी बुलेटिन रो बगत 5 मिनट ऊँ बधा र 10 मिनट कर दियो ज्यो है। ई सागे ई दोपहरां पाछे तीन बज्यां राजस्थानी मांय खास बजट बुलेटिन ई प्रसारित कर्यो जावेला।

000

भारतीय जनता पार्टी रा प्रदेश अध्यक्ष अर राज्यसभा सदस्य मदन राठौड़ कह्यो है के संसद मांय काल पेश कर्यो जावण वाळो केन्द्रीय बजट जनता ने मजबूत बणावण अर विकसित भारत री दिशा मांय खास कदम साबित व्हेला। आज झुंझुनूं दौरा रा बगत वे भरोसो जतायो के बजट मांय केंद्र सरकार री जनता रा भला री नीतियां और साफ व्हेला।

000

वित्त मंत्री निर्मला सीतारमण कानी ऊँ काल संसद मांय पेश कर्या जावण वाळा बजट ऊँ जनता ने घणी उम्मीदां हैं। पाली रा राजकीय बांगड़ कॉलेज रा असिस्टेंट प्रोफेसर मनीष भाटी इन्कम टैक्स अर जीएसटी री रेट मांय कमी री आस जतायी। वे कह्यो के टैक्स मांय कटौती ऊँ महंगाई कम व्हेला, जिण ऊँ जनता ने सीधो फायदो मिलेला।

000

प्रदेश मांय लगाया जा रह्या ग्राम उत्थान शिविरां रे ज़रिए हाल ताई 28 लाख लोगां ने फायदो दियो ज्यो है। मुख्यमंत्री भजनलाल शर्मा आज टोंक जिला रा निवाई मांय लगायी ज्या ग्राम उत्थान शिविर मांय आ जाणकारी दीनी। वे बतायो के प्रदेश मांय हाल ताई 941 ग्राम उत्थान शिविर लगाया जा चुक्या है। श्री शर्मा कह्यो के राज्य सरकार किसानां, नौजवानां अर महिलावां ने आगे बधावणो तैय कीनो है।

000

मुख्यमंत्री कह्यो के सरकार ढांढा-ढोर राखण वाळां सारू क्रेडिट राशि बधा र डोढ़ लाख रुपया कर दीनी है। वे किसानां ने आवता साल ताई खेती-किसानी अर कारखानां सारू दिन मांय ई बिजली मुहैया करावण रो भरोसो दिरायो। मुख्यमंत्री नौजवानां ऊँ मन लगा र पढ़ाई-लिखाई री अपील करता थकां कह्यो के प्रदेश मांय अब भर्ती परीक्षावां रो कोई पेपर लीक नी व्हेला अर भर्तियां सारू कैलेंडर जारी करी ज्यो है। श्री शर्मा प्रधानमंत्री सूर्य घर योजना अर राजीविका रे ज़रिये महिलावां ने मजबूत बणावण माथे ई ज़ोर दीनो।

वे टोंक जिला ने विकास रा 370 करोड़ रुपया ऊँ बत्ता खर्चा वाळा कामां री सौगात दीनी।

000

केंद्रीय कानून अर न्याय मंत्री अर्जुन राम मेघवाल आज बीकानेर रा सरकारी पॉलिटेक्निक कॉलेज मांय राख्खी ज्या कार्यक्रम मांय दिव्यांगजन अर बुजुर्गा ने जिन्दगी आसान बणावण रा साज-ओ-सामान दीना। सामाजिक न्याय अर अधिकारिता मंत्रालय कानी ऊँ राख्खी ज्या ई कार्यक्रम मांय 1 करोड़ 79 लाख रुपया रा खर्च ऊँ ऊपतू अंग, सुणबा री मशीनां अर व्हीलचेयर बांटी ज्या। ई मौके श्री मेघवाल कह्यो के अ साज-ओ-सामान आं लोगां ने खुद रे पाण ऊबा करण अर वां री रोज मर्रा री जिन्दगी ने आसान बणावण मांय मददगार साबित व्हेला। ई पाछे कानून मंत्री उदयरामसर मांय विकसित भारत-जी राम जी जन-जागरण अभियान रा तैत गांव वाळां ने सम्बोधित कीना।

000

देश मांय किसानां ने हाल तांई 25 करोड़ ऊँ बत्ता मृदा स्वास्थ्य कार्ड जारी करी ज्या है। जमीं मांय पोषक तत्वां री कमी आगी करण रा मकसद ऊँ सरकार साल 2015 मांय आ योजना चलायी ही। लारला साल जुलाई तांई ई योजना रा तैत 93 हजार ऊँ बत्ता किसानां ने सिखावण दीरीजी।

000

प्रधानमंत्री नरेंद्र मोदी आवता महीना परीक्षा पे चर्चा कार्यक्रम रे ज़रिये विद्यार्थियां, वां रा मायतां अर अध्यापकां सागे बातचीत करेला। ई सालाना आयोजन रो मकसद विद्यार्थियां ने बिना तनाव परीक्षा देवण सारू तैयार कर र वां मांय खुद माथे भरोसो जगावणो है। कार्यक्रम रे दौरान प्रधानमंत्री बच्चां ने धीरज बणायो राखण ऊँ जुड्या सुझाव देवेला अर वां रा मां-बाप अर अध्यापकां ने ई राय देवेला। ई बीच प्रधानमंत्री एक वीडियो संदेश जारी कर र मायतां ऊँ परीक्षा रे दौरान घर रो माहौल हल्को-फुल्को बणायो राखण री अरज कीनी।

000

देश मांय नीट पीजी परीक्षा रा तीजा दौर री काउंसलिंग रो काम सरू व्हे ग्यो है। स्वास्थ्य सेवा महानिदेशालय रे मुजब काउंसलिंग पोर्टल नुवा नाम मण्डावण सारू ई खोल दियो ज्यो है। पात्र उम्मीदवारा ने मौको देवण सारू काउंसलिंग रा ई दौर मांय कुछ और सीटां जोड़ी ज्यी है। उम्मीदवार मेडिकल काउंसलिंग कमेटी री आधिकारिक वेबसाइट माथे मौजूद विकल्प चुण सके है।

000

प्रदेश रा 12 जिलां मांय आज बिरखा व्हेवण अर ओला पड़बा रो ऑरेंज अर येलो अलर्ट जारी करी ज्यो है। मौसम विभाग जयपुर, भरतपुर, अजमेर, उदयपुर अर कोटा संभाग मांय जोरदार बायरो बाजण सागे बादळां री गाज बीचे मेह बरसबा रा आसार जताया है। ई बीचे राजधानी जयपुर अर कोटा समेत केई ठाँडां संवारे ऊँ ई बादळा मण्ड्या रह्या। जयपुर, बीकानेर, श्रीगंगानगर अर दौसा समेत कई जिलां मांय पारो 2 डिग्री सेल्सियस तांई चढ्यो। कोटा मांय न्यूनतम तापमान करीब 5 डिग्री सेल्सियस बत्तो नापी ज्यो। सब ऊँ कम 7 डिग्री सेल्सियस न्यूनतम तापमान अलवर मांय दर्ज करी ज्यो।

000

झुंझुनू जिला रा प्रभारी सचिव नवीन जैन आज एक गैर-सरकारी स्कूल मांय बच्चां ने 'स्पर्श' अभियान रा तैत गुड टच-बैड टच रा बारा मांय जाणकारी दीनी। प्रभारी सचिव कह्यो के बच्चां ने सावचेत बणा र अपराधां माथे रोक लगायी जा सके है। वे बतायो के आवता बगत मांय अध्यापकां ने ई ई बारा मांय सिखावण दी जावेला।

000

जयपुर रा कानोता, चंदलाई अर नेवटा बंधां रा पाणी ने गन्दो व्हेवण ऊँ बचावण सारू केन्द्र सरकार रा जाणकारां री टीमां पाणी री गुणवत्ता सुधारण अर प्रदूषण रा कारणां री ठा कर रही है। जल संसाधन मंत्री सुरेश सिंह रावत आ जाणकारी दीनी। वे बतायो के जाणकार बेगी ई इण री रपट सरकार रो सूपेला।

रपट मांय नुवी तकनीक ऊँ पाणी साफ करण, जैव विविधता ने बचावण अर पर्यावरण पर्यटन विकसित करण री योजना रा बारा मांय सुझाव ई शामिल व्हेला।

000

जयपुर मांय आज बर्ड फेस्टिवल सारू व्ह्यो। कानोता मांय चाल रह्या दो दिन रा बर्ड फेस्टिवल रा पैला दिन विद्यार्थियां सारू प्रकृति रा बारा मांय प्रश्नोत्तरी नेचर क्विज, पेंटिंग अर बर्ड वाचिंग सत्र राख्यी ज्या। जाणकार बच्चां री परिदां री 25 ऊँ बत्ती प्रजातियां अर वां रा रहवास रा बारा मांय जाणकारी दीरीजी। उत्सव मांय पद्मश्री अनूप शाह अर डॉ. असद रहमानी समेत देश-परदेश रा जाणकार भाग ले रह्या है। काल प्रतिभागियां ने सांभर झील अर केवलादेव राष्ट्रीय उद्यान समेत न्यारा-न्यारा वन्यजीव हलकां री सैर करायी जावेला।

000

जैसलमेर मांय चाल रह्या मरु महोत्सव रा तीजा दिन आज डेडानसर मैदान मांय केई कार्यक्रम राख्यी ज्या। महोत्सव मांय वायु सैनिक एयर वॉरियर ड्रिल रे ज़रिये वां री कला रो दरसाव कीनो। सीमा सुरक्षा बल रा जवान 'कैमल टैटू शो' अर माउंटेन बैड री धुनां सागे हैरतअंगेज करतब बताया। आं क्रियाक्रमां ने देखण सारू वठे रा लोगां सागे मोटी तादाद मांय देशी-परदेशी सैलाणी ई पूग्या। लोक कलाकार ई सांस्कृतिक कार्यक्रम पेश कीना।

000

पर्यावरण, वन अर जलवायु परिवर्तन मंत्री भूपेंद्र यादव देश मांय रामसर हलकां मांय दो और नम भूमि हलका शामिल करण रो ऐलाण कीनो है। उत्तर प्रदेश मांय ऐटा जिला रा पटना पक्षी अभ्यारण्य अर गुजरात मांय कच्छ जिला रा छारी-ढांड रा आं हलकां सागे देश मांय रामसर ठौड़ां री तादाद बध र 98 व्हे ग्यी है। प्रधानमंत्री नरेन्द्र मोदी ई माथे खुशी जताता थकां वठे रा लोगां ने बधाई दीनी है।

000